

## **Instrución 11/2023 da Dirección Xeral de Formación Profesional pola que se regulan as probas de certificación das ensinanzas de idiomas de réxime especial polo réxime libre para o curso 2023/24.**

O Decreto 81/2018, do 19 de xullo, establece a ordenación das ensinanzas de idiomas de réxime especial e os currículos dos niveis básico A1, básico A2, intermedio B1, intermedio B2, avanzado C1 e avanzado C2. Esta norma dispón que a consellería competente en materia de educación regulará o procedemento de avaliación, promoción e permanencia do alumnado destas ensinanzas.

O Real decreto 1/2019, do 11 de xaneiro, establece os principios básicos comúns de avaliación aplicables ás probas de certificación oficial dos niveis intermedio B1, intermedio B2, avanzado C1 e avanzado C2 das ensinanzas de idiomas de réxime especial.

Na Instrución 8/2023, da Dirección Xeral de Formación Profesional, para a elaboración e administración das probas de certificación das ensinanzas de idiomas de réxime especial para o curso 2023/24, establécese o procedemento para a elaboración, administración e avaliación das probas para a obtención dos certificados dos niveis regulados no Decreto 81/2018, do 19 de xullo, para o curso 2023/24.

No punto 20.5 b) da Resolución do 16 de maio de 2023, da Dirección Xeral de Formación Profesional, pola que se ditan instrucións para a preinscrición, admisión, matrícula e organización académica nas Escolas Oficiais de Idiomas de Galicia no curso 2023/24, establécese que a Dirección Xeral de Formación Profesional organizará unha convocatoria das probas para a obtención dos certificados de nivel básico A2, intermedio B1, intermedio B2 e avanzado C1, nas datas que esta determine, non máis tarde do mes de febreiro; e que poderá establecer criterios de asignación de prazas para aqueles idiomas e niveis cuxa demanda o xustifique.

Polo tanto, co obxecto de organizar as probas de certificación dos niveis básico A2, intermedio B1, intermedio B2 e avanzado C1 polo réxime libre para o curso 2023/24, esta Dirección Xeral dita as seguintes instrucións:



## I. CARACTERÍSTICAS DAS PROBAS DE CERTIFICACIÓN

### 1.1. Nivel básico A2

1.1.1. As probas de certificación de nivel básico A2 terán como referencia o recollido para este nivel de competencia no *Marco europeo común de referencia para as linguas* e o currículo do nivel básico A2 publicado como Anexo I do Decreto 81/2018.

1.1.2. No curso 2023/24 administraranse probas de certificación de nivel básico A2 nos idiomas alemán, árabe, chinés, español como lingua estranxeira, francés, galego, inglés, italiano, portugués, ruso e xaponés.

1.1.3. As probas de certificación do nivel básico A2 seguirán o disposto na *Guía informativa e de especificacións das probas de certificación de nivel básico A2*, que pode consultarse na seguinte ligazón:

[https://www.edu.xunta.gal/portal/sites/web/files/guia\\_informativa\\_e\\_de\\_especificacions\\_a2\\_2024.pdf](https://www.edu.xunta.gal/portal/sites/web/files/guia_informativa_e_de_especificacions_a2_2024.pdf)

### 1.2. Nivel intermedio B1

1.2.1. As probas de certificación de nivel intermedio B1 terán como referencia o recollido para este nivel de competencia no *Marco europeo común de referencia para as linguas* e o currículo do nivel intermedio B1 publicado como Anexo I do Decreto 81/2018.

1.2.2. No curso 2023/24 administraranse probas de certificación de nivel intermedio B1 nos idiomas alemán, árabe, chinés, español como lingua estranxeira, francés, galego, inglés, italiano, portugués, ruso e xaponés.

1.2.3. As probas de certificación do nivel intermedio B1 seguirán o disposto na *Guía informativa e de especificacións das probas de certificación de nivel intermedio B1*, que pode consultarse na seguinte ligazón:

[https://www.edu.xunta.gal/portal/sites/web/files/guia\\_informativa\\_e\\_de\\_especificacions\\_b1\\_2024.pdf](https://www.edu.xunta.gal/portal/sites/web/files/guia_informativa_e_de_especificacions_b1_2024.pdf)

### 1.3. Nivel intermedio B2

1.3.1. As probas de certificación de nivel intermedio B2 terán como referencia o recollido para este nivel de competencia no *Marco europeo común de referencia para as linguas* e o currículo do nivel intermedio B2 publicado como Anexo I do Decreto 81/2018.

1.3.2. No curso 2023/24 administraranse probas de certificación de nivel intermedio B2 nos idiomas alemán, español como lingua estranxeira, francés, galego, inglés, italiano, portugués e xaponés.

1.3.3. As probas de certificación do nivel intermedio B2 seguirán o disposto na *Guía*



*informativa e de especificacións das probas de certificación de nivel intermedio B2*, que pode consultarse na seguinte ligazón:

[https://www.edu.xunta.gal/portal/sites/web/files/guia\\_informativa\\_e\\_de\\_especificacions\\_b2\\_-\\_libre\\_2024.pdf](https://www.edu.xunta.gal/portal/sites/web/files/guia_informativa_e_de_especificacions_b2_-_libre_2024.pdf)

#### **1.4. Nivel avanzado C1**

1.4.1. As probas de certificación de nivel avanzado C1 terán como referencia o recollido para este nivel de competencia no *Marco europeo común de referencia para as linguas* e o currículo do nivel avanzado C1 publicado como Anexo I do Decreto 81/2018.

1.4.2. No curso 2023/24 administraranse probas de certificación de nivel avanzado C1 nos idiomas alemán, español como lingua estranxeira, francés, galego, inglés, italiano e portugués.

1.4.3. As probas de certificación do nivel avanzado C1 seguirán o disposto na *Guía informativa e de especificacións das probas de certificación de nivel avanzado C1*, que pode consultarse na seguinte ligazón:

[https://www.edu.xunta.gal/portal/sites/web/files/guia\\_informativa\\_e\\_de\\_especificacions\\_c1\\_libres\\_2024.pdf](https://www.edu.xunta.gal/portal/sites/web/files/guia_informativa_e_de_especificacions_c1_libres_2024.pdf)

## **2. ACCESO ÁS PROBAS**

2.1. Poderanse matricular nas probas de certificación do idioma que cursaran como primeira lingua estranxeira na educación secundaria obrigatoria aquelas persoas que teñan dezaseis anos cumpridos ou que os cumpran antes do 31 de decembro de 2024.

2.2. Poderanse matricular nas probas de certificación dos idiomas que non cursaran como primeira lingua estranxeira na educación secundaria obrigatoria aquelas persoas que teñan catorce anos cumpridos ou que os cumpran antes do 31 de decembro de 2024.

2.3. O alumnado libre poderá matricularse nos niveis básico A2, intermedio B1, intermedio B2 e avanzado C1 das probas de certificación, previo pagamento dos prezos públicos correspondentes, sen que sexa requisito obter o certificado do nivel ou niveis anterior(es).

2.4. O alumnado que xa realizou estudos nunha EOI en cursos anteriores e desexe matricularse polo réxime libre noutra escola en 2023/24, deberá indicar esta circunstancia coa súa solicitude de matrícula para que a escola onde se matricula como alumno/a libre solicite o traslado de expediente á escola de orixe.



### 3. INSCRIPCIÓN NAS PROBAS

A inscrición realizarase en liña, dende o enderezo seguinte:

<https://www.eoidigital.com/eoixuntalibre>

#### 3.1. Prazo de inscrición

O prazo de inscrición nas probas de certificación para o alumnado libre será do 2 ao 20 de outubro de 2023, ambos incluídos. A aplicación web de matrícula permanecerá aberta ata as 12:00 do mediodía do 20 de outubro.

#### 3.2. Trámites de inscrición e aboamento dos prezos públicos correspondentes

##### 3.2.1. Procedemento

Realizarase unha solicitude para cada idioma e nivel no que se desexe matricularse.

a) Para os niveis B2 e C1 de galego e inglés o alumnado deberá seleccionar todos os centros en que se van administrar as probas, de acordo coa súa orde de preferencia.

No momento de cubrir o formulario de inscrición, a aplicación asignaralle un número a cada solicitude, independentemente da escola, idioma e nivel solicitados. Para a asignación de prazas, o sistema informático obterá un número de corte por idioma a partir do cal se asignarán as vacantes dispoñibles, número que se obterá aleatoriamente entre todos os números asignados a cada solicitante dese idioma e nivel. A adxudicación de prazas realizarase por opción, empezando pola solicitude que teña o número obtido no sorteo e asignándolle a primeira opción a todas as persoas solicitantes, ata completar o número de prazas dispoñibles. A continuación asignaranse as seguintes opcións, respectando a orde de preferencia indicada na solicitude ata que todas as persoas solicitantes sexan asignadas a unha escola.

A obtención do número para a adxudicación das prazas realizarase en acto público, o día 23 de outubro, ás 12.00 horas, na EOI de Ferrol (rúa Real, 29, Ferrol). O día 24 de outubro, o alumnado poderá consultar na aplicación web a escola onde foi admitido.

b) O alumnado procedente dos cursos ExamPrepB2 e ExamPrepC1 deberá formalizar a súa matrícula seguindo o procedemento anterior, de acordo co establecido no punto 6.3 da Instrución 9/2023 da Dirección Xeral de Formación Profesional. Este alumnado poderá matricularse unicamente no centro no que realizou os cursos e seralle de aplicación o establecido no apartado 3.2.1 a) da presente Instrución.



c) Para o resto dos idiomas e niveis seleccionárase unicamente a escola onde se queira realizar a proba.

### 3.2.2. Documentación

A matrícula feita en liña non terá validez ata que o alumnado a formalice, a través a aplicación web, na escola onde foi admitido. Para formalizar a matrícula, o alumnado deberá presentar a seguinte documentación:

- O impreso de matrícula xerado pola aplicación web de matrícula, onde se indique(n) o(s) idioma(s) e o nivel ou niveis no(s) que se matricula.
- O resgado do aboamento dos prezos públicos segundo o Decreto 89/2013, de 13 de xuño (DOG do 17 de xuño de 2013), polo que se fixan os prezos públicos correspondentes aos estudos conducentes á obtención dos títulos oficiais nas ensinanzas de música e artes escénicas, de idiomas, deportivas, de conservación e restauración de bens culturais e nos estudos superiores de deseño.
- Unha fotocopia do DNI ou, no caso de persoas estranxeiras, NIE ou pasaporte.
- Para o alumnado que sexa menor de 16 anos a 31 de decembro de 2024, un certificado no que se faga constar a primeira lingua estranxeira cursada na educación secundaria obrigatoria no presente curso escolar, expedido polo centro onde estea matriculado, consonte o modelo do Anexo I.

A documentación presentarase desde a ligazón <https://www.eoidigital.com/eoixuntalibre>. As persoas interesadas responsabilizaranse da veracidade dos documentos que presenten. As escolas poderánlle solicitar ao alumnado a presentación dos documentos orixinais para o cotexo da copia electrónica presentada.

O prazo para a presentación desta documentación será ata o 31 de outubro.

3.2.3. O pagamento da matrícula para as probas de certificación do alumnado libre non poderá ser fraccionado.

## 3.3. Alumnado con diversidade funcional

3.3.1. De acordo co establecido no artigo 11.6. do Decreto 81/2018, do 19 de xullo, no caso do alumnado con diversidade funcional, o deseño, a administración e a avaliación das probas para a obtención dos certificados terán que basearse nos principios de igualdade de oportunidades, non discriminación e compensación de desvantaxes. Os



procedementos de avaliación conterán as medidas que resulten necesarias para a súa adaptación ás necesidades especiais deste alumnado.

3.3.2. O alumnado que precise condicións especiais para a realización das probas debido a algún tipo de discapacidade física ou sensorial, tales como discapacidade visual, parcial ou total, e algúns graos de discapacidade motriz e de hipoacusia, trastornos da fala, ou discapacidades múltiples deberá xustificalo mediante a documentación acreditativa e, se solicita adaptacións, deberá cubrir o formulario facilitado pola EOI (Anexo II desta Instrución). A EOI poñerá esta circunstancia en coñecemento dos equipos de orientación específicos dependentes da Xefatura Territorial respectiva para que se determinen as adaptacións pertinentes, tendo en conta as medidas recollidas no Anexo III.

3.3.3. En calquera caso, de acordo co disposto no artigo 3.9 do Real decreto 1/2019, do 11 de xaneiro, o alumnado que necesite condicións especiais para a realización da avaliación de certificación non será dispensado da realización de ningunha das partes das que conste a proba, que será única para todo o alumnado.

3.3.4. O alumnado ao que se refire o punto 3.3.2 da presente Instrución realizará as probas na EOI onde formalice a solicitude, sen que lle sexa de aplicación o establecido no punto 3.2.1 a).

#### **3.4. Incompatibilidades**

3.4.1. O alumnado non poderá estar matriculado no mesmo idioma e curso no mesmo ano académico por ensino oficial e libre simultaneamente.

3.4.2. Non se poderán examinar das probas de certificación dunha lingua aquelas persoas que participasen na súa elaboración ou no seu proceso de configuración final.

3.4.3. Así mesmo, o profesorado que imparta docencia nunha EOI non se poderá matricular nas probas de certificación de ningún idioma na propia EOI na que imparte ou impartira docencia no curso 2023/24, e, en ningún caso se poderá matricular para realizar as probas de certificación do(s) idioma(s) que imparte en ningunha EOI de Galicia. No caso de profesorado interino ou substituto que estivera matriculado previamente nunha escola, este deberá solicitar o traslado de expediente a outro centro, ou ben poderá renunciar á matrícula.



3.4.4. O persoal non docente destinado nunha EOI no curso 2023/24 non poderá matricularse nas probas de certificación polo réxime libre no centro onde desempeñe o seu labor, aínda que poderá formalizar a súa matrícula noutra escola. No caso de árabe e ruso, por seren idiomas que se imparten unicamente na EOI da Coruña, e no caso de xaponés, B1 e B2, impartidos unicamente na EOI de Vigo, o persoal non docente que traballe nestas escolas poderá formalizar a matrícula polo réxime libre neses idiomas no dito centro.

### **3.5. Estatística**

Unha vez rematado o prazo de matrícula, e antes do 15 de decembro, as EOI remitiranlle ao Servizo de Ensinanzas de Réxime Especial e Aprendizaxe Permanente unha estatística co número de matrícula por idioma e nivel, consonte o Anexo IV desta Instrución.

## **4. ESTRUTURA, CUALIFICACIÓN E RECLAMACIÓN ÁS PROBAS**

4.1. Os equipos directivos das escolas garantirán que o alumnado dispoña de información completa sobre a estrutura, contido, criterios de avaliación e cualificación de todas as probas, así como das condicións e prazos de reclamación sobre a súa cualificación.

4.2. Para isto, as escolas publicarán as indicacións establecidas nesta Instrución, xunto coas guías informativas e de especificacións das probas de certificación de cada nivel. Así mesmo, publicarán tamén as táboas de avaliación para as actividades de produción e coprodución de textos orais, produción e coprodución de textos escritos, mediación oral e mediación escrita, que se incluírán na guía de avaliación e cualificación que esta Dirección Xeral enviará aos centros antes da realización das probas.

4.3. O último día para a publicación das notas será o 26 de xaneiro.

4.4. Para o procedemento de reclamación será de aplicación o establecido no apartado 23 da Resolución de 16 de maio de 2023.

## **5. ADMINISTRACIÓN DAS PROBAS**

5.1. As probas de certificación administraranse nas sedes das Escolas Oficiais de Idiomas. Non se administrarán probas nas seccións.

O profesorado destinado nas seccións desprazarase á EOI da que dependa nunha proporción acorde ao número de persoas matriculadas nas probas e ás condicións



específicas de cada Escola. Coa finalidade de que a Inspección Educativa poida autorizar o desprazamento do persoal docente das seccións, as direccións deberán remitir as listaxes do profesorado que se deberá desprazar cun mínimo de 15 días hábiles de antelación.

O persoal destinado nas seccións que se desprace realizará as funcións de organización, administración e avaliación das probas de certificación na sede da que dependa.

No caso da EOI de Santiago de Compostela, se non fose posible administrar as probas para todo o alumnado na sede central, establecerase unha sede complementaria na propia cidade, que se anunciará coa antelación suficiente na páxina web da escola.

5.2. As probas de cada nivel administraranse para todos os idiomas nas sedes das escolas onde estean implantados estes niveis.

5.3. Para a súa correcta administración deberán terse en conta as guías de administración das probas de cada nivel que a Dirección Xeral de Formación Profesional lles remitirá ás Escolas Oficiais de Idiomas.

5.4. A cualificación da produción e coprodución de textos escritos, da mediación escrita, da produción e coprodución de textos orais e da mediación oral das probas será realizada por tribunais formados, polo menos, por dous membros do departamento correspondente.

5.5. Con carácter excepcional, e logo da autorización da Xefatura Territorial correspondente, poderase variar o horario lectivo das escolas ou seccións naquelas franxas horarias nas que a necesidade de espazos e profesorado o fagan necesario para o correcto desenvolvemento das probas. A solicitude deberá ser remitida á Xefatura Territorial pola dirección das escolas cun mínimo de 15 días hábiles de antelación.

## **6. CALENDARIO DAS PROBAS**

6.1. A convocatoria libre das probas de certificación para os niveis intermedio B2 e avanzado C1 administrárase nas datas establecidas no Anexo V desta Instrución.

6.2. No caso de que, por razóns debidamente xustificadas e excepcionais por causas imputables ao centro, as probas de certificación non se puidesen administrar nos calendarios establecidos, a escola deberá informar e solicitar ao Servizo de Ensinanzas de Réxime Especial e Aprendizaxe Permanente da Dirección Xeral de Formación Profesional a autorización para administrar a proba de reserva noutra hora e/ou data.





6.3. A parte escrita da proba dos niveis básico A2 e intermedio B1 de todos os idiomas realizarase de acordo co calendario que estableza cada escola, que deberá publicarse antes do remate do prazo de inscrición, tanto nos taboleiros de anuncios como na páxina web da escola. As datas das probas destes niveis poderán coincidir coas datas fixadas para os niveis B2 e C1.

6.4. As datas das probas de produción e coprodución de textos orais e de mediación oral serán fixadas por cada escola, que deberá facelas públicas, cando menos, cunha semana de antelación con respecto á realización da proba, tanto nos taboleiros de anuncios como na páxina web da escola. Estas probas poderán realizarse antes ou despois das probas escritas.

6.5. A EOI de Vigo establecerá o calendario de realización das probas de certificación de nivel intermedio B2 de xaponés.

6.6. Os calendarios fixados polas escolas deberán ser autorizados polo Servizo de Inspección Educativa correspondente.

Santiago de Compostela, na data da sinatura dixital,

A Directora Xeral de Formación Profesional

María Eugenia Pérez Fernández





ANEXO I

**Certificación da primeira lingua estranxeira cursada na educación secundaria obrigatoria**

Don(a) .....  
secretario/a do centro .....  
con código de centro nº ....., na localidade ..... (provincia .....),

CERTIFICO:

Que don(a)....., con DNI .....  
....., está matriculado/a actualmente neste centro no ..... curso das  
ensinanzas de educación secundaria obrigatoria, e que o idioma que cursa como  
primeira lingua estranxeira é .....

Asino esta certificación por pedimento do/a interesado/a e para os efectos de  
matrícula polo réxime libre na escola oficial de idiomas.

..... de ..... de 2023

V. e pr. do/a director(a)

O/A secretario/a

(Selo do centro)





ANEXO II

Solicitud de adaptación da proba

En cumprimento do establecido no artigo 11. 6 do Decreto 81/2018, do 19 de xullo<sup>1</sup>, no que se recolle o seguinte: *No caso do alumnado con diversidade funcional, o deseño, a administración e a avaliación das probas para a obtención dos certificados terán que basearse nos principios de igualdade de oportunidades, non discriminación e compensación de desvantaxes. Os procedementos de avaliación conterán as medidas que resulten necesarias para a súa adaptación ás necesidades especiais deste alumnado.*

O/a alumno/a ..... , con DNI/NIE ..... , domicilio en ..... código postal ..... na rúa ..... , núm. .... andar/porta ..... , teléfono ..... , correo electrónico ..... , matriculado/a na modalidade libre para a PROBA DE CERTIFICACIÓN do nivel

- BÁSICO A2 de ..... no curso académico ..... (ESPECIFICAR LINGUA)
 INTERMEDIO B1 de ..... no curso académico .....
 INTERMEDIO B2 de ..... no curso académico .....
 AVANZADO C1 de ..... no curso académico .....

Presenta a seguinte dificultade sensorial ou motora que lle impide desenvolver con normalidade a devandita proba:

.....

Para xustificalo, presenta os seguintes informes/certificados<sup>2</sup> emitidos polas seccións provinciais de cualificación e valoración de discapacidade:

.....

Polo que SOLICITA que se fagan as adaptacións pertinentes para garantir unha proba de acordo cos principios de igualdade de oportunidades, non discriminación e compensación de desvantaxes.

..... de ..... de .....

1 Decreto 81/2018, do 19 de xullo, polo que se establece o currículo dos niveis básico A1, básico A2, intermedio B1, intermedio B2, avanzado C1 e avanzado C2 das ensinanzas de idiomas de réxime especial na Comunidade Autónoma de Galicia (DOG do 13 de agosto).

2 Este documento non ten validez sen documentación xustificativa.





## ANEXO III

### **Medidas para a atención do alumnado con necesidades especiais**

O artigo 11.6. do Decreto 81/2018, do 19 de xullo, polo que se establece o currículo dos niveis básico A1, básico A2, intermedio B1, intermedio B2, avanzado C1 e avanzado C2 das ensinanzas de idiomas de réxime especial na Comunidade Autónoma de Galicia dispón que o deseño, a administración e a avaliación das probas para a obtención dos certificados por parte do alumnado con discapacidade se basearán nos principios de igualdade de oportunidades, non discriminación e compensación de desvantaxes e que os procedementos de avaliación conterán as medidas que resulten necesarias para a súa adaptación ás necesidades especiais deste alumnado.

O apartado 22 da Resolución do 16 de maio de 2023, da Dirección Xeral de Formación Profesional, pola que se ditan instrucións para a preinscrición, admisión, matrícula e organización académica nas escolas oficiais de idiomas de Galicia no curso 2023/24 establece que se deberán adaptar, se é o caso, a duración e as condicións de realización das probas.

De acordo co establecido no apartado 3.3 da presente instrución, este alumnado deberá solicitalo no momento da matrícula e achegar a documentación acreditativa, que o centro poñerá en coñecemento dos equipos de orientación específicos dependentes da xefatura territorial para as adaptacións pertinentes.

Unha vez recibido o informe do equipo de orientación específico, será labor do departamento correspondente, tras informar a comisión de validación de probas de certificación, adaptar as probas de xeito individual, atendendo as necesidades especiais de cada persoa candidata e consonte as medidas suxeridas a continuación.

En calquera caso, de acordo co disposto no artigo 3.9 do Real decreto 1/2019, do 11 de xaneiro, o alumnado que necesite condicións especiais para a realización da avaliación de certificación non será dispensado da realización de ningunha das partes das que conste a proba, que será única para todo o alumnado.





## MEDIDAS POSIBLES DE ADAPTACIÓN DAS PROBAS PARA AS PERSOAS CANDIDATAS CON NECESIDADES ESPECIAIS

### a) Persoas con deficiencias visuais e invidentes:

- Material da proba en escritura táctil (sistema Braille estándar).
- Material a tamaño ampliado.
- Prolongación do tempo de realización da proba (segundo as necesidades particulares).
- Reprodución dos medios de son coas pausas intermedias que sexan necesarias para responder as preguntas e para ditar, escribir ou mecanografar as respostas (*comprensión de textos orais*).

### b) Persoas con discapacidade auditiva parcial ou total:

- Proba de *comprensión de textos orais* presentada mediante lingua de signos en vídeo.
- Intérprete de lingua de signos encargado/a e pagado/a pola persoa candidata.
- Aumento do volume na reprodución dos medios de son.
- Repeticións adicionais do texto oral.

### c) Persoas candidatas con trastornos da lectura e/ou escritura (disortografía):

### d) Prolongación do tempo da proba (segundo as necesidades particulares). Persoas con trastornos da escritura (disgrafía):

- Prolongación do tempo da proba (segundo as necesidades particulares).
- Utilización dun ordenador de sobremesa ou portátil exento de unidades de axuda.
- Un/ha secretario/a, examinador/a, profesor/a escribe o texto que vai sendo ditado, consulta coa persoa candidata para asegurar a ortografía e, ao remate, entrega a esta o texto.

### e) Á hora de cualificar a proba oral das persoas candidatas con trastornos da fala haberá que considerar o grao da discapacidade.

### f) A realización da proba por parte das persoas candidatas con discapacidades múltiples é posible mediante a combinación de diferentes tipos de medidas.





ANEXO IV

NOME DA ESCOLA		LOCALIDADE	
----------------	--	------------	--

INFORME ESTATÍSTICO PROBAS DE CERTIFICACIÓN LIBRES • CURSO 2023/24

	Básico A2	Intermedio B1	Intermedio B2	Avanzado C1	ALUMADO TOTAL	Nº de tribunais
Alemán						
Árabe						
Chinés						
ELE						
Francés						
Galego						
Inglés						
Italiano						
Portugués						
Ruso						
Xaponés						
TOTAL						



**ANEXO V**  
**ESCOLAS OFICIAIS DE IDIOMAS • PROBAS DE CERTIFICACIÓN**  
**INTERMEDIO B2 E AVANZADO C1**  
**CALENDARIO DE REALIZACIÓN • CURSO ACADÉMICO 2023/24**

**CONVOCATORIA LIBRE**

Alemán - nivel intermedio B2	15 de xaneiro	16:00 h
Alemán - nivel avanzado C1	10 de xaneiro	16:00 h
Español como lingua estranxeira - nivel intermedio B2	19 de xaneiro	10:00 h
Español como lingua estranxeira - nivel avanzado C1	18 de xaneiro	10:00 h
Francés - nivel intermedio B2	17 de xaneiro	16:00 h
Francés - nivel avanzado C1	12 de xaneiro	16:00 h
Galego - nivel intermedio B2	17 de xaneiro	10:00 h
Galego - nivel intermedio B2 (2ª quenda)*	19 de xaneiro	10:00 h
Galego - nivel avanzado C1	15 de xaneiro	10:00 h
Galego - nivel avanzado C1 (2ª quenda)*	18 de xaneiro	10:00 h
Inglés - nivel intermedio B2	16 de xaneiro	16:00 h
Inglés - nivel intermedio B2 (2ª quenda)*	19 de xaneiro	16:00 h
Inglés - nivel avanzado C1	11 de xaneiro	16:00 h
Inglés - nivel avanzado C1 (2ª quenda)*	18 de xaneiro	16:00 h
Italiano - nivel intermedio B2	12 de xaneiro	10:00 h
Italiano - nivel avanzado C1	10 de xaneiro	10:00 h
Portugués - nivel intermedio B2	16 de xaneiro	10:00 h
Portugués - nivel avanzado C1	11 de xaneiro	10:00 h

As datas das probas de produción e coprodución de textos orais e de mediación oral serán fixadas por cada EOI. Estas poderán realizarse antes ou despois das probas escritas e cada EOI deberá publicar as datas, cando menos, cunha semana de antelación con respecto á realización da proba.

\* Para os idiomas galego e inglés establécese unha segunda quenda, que se administraría exclusivamente no caso de que non fose posible examinar a todo o alumnado nunha única quenda. Neste caso, o alumnado distribuiríase equitativamente en ambas as quendas.

